

Letsatsi la Lefatshe la Puisogodimo



**GO SIMOLOLA
KA LEINANE.**


le Nal'ibali Ya dingwaga tsa ntlha !

Monongwaga re rata go laletsa malapa le batlhokomedi ba bana ba bannye go buisa le rona ka Letsatsi la Lefatshe la **Puisogodimo**, ka February 7, 2024 – le ka letsatsi lengwe le lengwe. Leinane la rona le le kgethegileng, *Katsana e e timetseng* le kwadilwe ke Stacey Fru mme le tshwantshtswe ke Rico. Leinane leno le teng ka dipuo tsotlhe tse 11 tsa Semmuso tsa mo Aforika **Borwa Karata** eno ya leinane e diretswe wena ka mo go kgethegileng!



Pele ga Letsatsi la Lefatshe la Puisogodimo

- Itse leinane sentle gore o kgone go tlotla gape ka lone kgotsa go le buisetsa kwa godimo ka tsela ya gago.
- Akanya ka se o ka se dirang go dira gore kgang eno e tshel.
- Swetsa gore o batla go dirisa tebego efe ya sefatlhego le go itshikinya mmele gofe.
- Tlhopha nako ya letsatsi moo lelapa lotlhe le ntseng mmogo ka yone go ba tlotlela kgang eno.
- Batla dikarolo tsa leinane tse mo go tsone bana ba lona ba ka nngang le seabe mo go tsone, ka sekai, ba ka dira medumo e e dirwang ke katsana le ntša.
- Ithapisetse go tlotla kgotsa go buisetsa leinane kwa godimo.



Pele ga o buisetsa leinane kwa godimo

- Segolola ditshwantsho tsa diphologolo tse di jaaka dintša, dikatse, bommutla le dikhudu tse di ka ruiwang jaaka diruiwa tsa mo gae. Dira gore ngwana mongwe le mongwe a tlhophe setshwantsho se a tla se tshwarang jaaka seruiwa sa gagwe sa mo gae fa o ntse o buisa leinane.
- Botsa dipotso kgotsa bua ka dilo tse di tla thusang bana ba gago go tlhoma mogopolo mo leinaneng. Ka sekai, ba bontshe setshwantsho sa katse kgotsa sa katsana. Bua ka diphologolo tse re di ruang jaaka diruiwa tsa mo gae.
- Buisa setlhogo sa leinane. Botsa jaana, "O akanya gore leinane leno le bua ka eng?"



Fa o ntse o buisetsa leinane kwa godimo

- Fa o ntse o buisa leinane, botsa bana ba gago dipotso ka lone. Dipotso tse di jaaka, "O akanya gore ke eng a dirile jalo?" le "Wena o ka bo o dirile eng?" di thusa ngwana wa gago gore a kgone go utlwele batho ba bangwe botlhoko le go ba tlhologanya.
- Dira gore bana ba gago ba nne le seabe mo go direng medumo e e dirwang ke diphologolo.



Ipoleleng gore lo batla go buisetsa kwa godimo jaaka lelapa mo Letsatsing leno la Lefatshe la Puisogodimo – lo bo lo go dire selo sa letsatsi lengwe le lengwe. Ikwadise mo go www.nalibali.org kgotsa romela lefoko "WRAD" ka WhatsApp go **0600 44 22 54**. Lelapa lengwe le lengwe le le ikwadisang le tla kgona go nna karolo ya **loeto la go buisa jaaka lelapa ka Letsatsi la Lefatshe la Puisogodimo la Nal'ibali**. O tla **newa dikgang tse dingwe ga mmogo le dikakantsho le dikgopolo ka kafa o ka balelang bana ba gago ka gone ngwaga otlhe**

Katsana e e timetseng

Leinane ka Stacey Fru © Ditshwantsho ka Rico



Ka Labotlhano thapama, Neo le Bella ba ne ba tshameka mo tshingwaneng ya ga Neo. Noodle o ne a robetse monate.



Meow, meow, meow! Katsana e nnye wa mmala wa namune e ne ya tla e gagaba go tswa mo ditlhatsaneng.



“Bona, e na le kholara e ntle e pududu mo thamong ya yone,” Neo a rialo.

Neo le Bella ba ne ba e isa kwa ntlong.

“Mama, Papa, bonang! Re bone katsana mo tshingwaneng!” Neo a goa jalo.

“E tshwanetse ya bo e le ya mongwe ka gone e na le kholara e pududu mo thamong ya yone,” ga rialo Bella.

“Re tshwanetse go leka go batla beng ba yone,” a rialo Papa.



Kamoso re ka dira diposetara tsa katsana e e timetseng. Gongwe mong wa yone o tla bona diposetara tseo,” a rialo Mama.

Neo o ne a bona lebokoso la ditlhako le jeresi ya bogologolo go direla katsana bolao jo bo bothito. Papa o ne a e fepa mme a e naya metsi a a phepa ka sejana se segolo.




Ka Matlhatso mo mosong, Bella o ne a fitlha phakela. "Mma re direng diposetara," a rialo.

Ba ne ba dira diposetara di le nnè. "Mma re ye go di pega," Papa a rialo

Sa ntlha ba ne ba ya kwa laeboraring...

go tswa foo ba ya kwa lebenkeleng...

go tswa foo moagelani o ne a ba letla go pega posetara mo hekeng ya gagwe.



Ba ne ba boloka posetara e le nngwe go ya e pega kwa sekolong.

Ka Labobedi thapama, Neo, Bella, Noodle le katsana ba ne ba tshameka mo phaphosing ya bonno. *Koo koo, koo koo, koo koo!* Go ne go na le mongwe yo o kokotang.

Noodle o ne a bogola ka boitumelo.

Katsana ya tshoha thata mme ya sia ya iphitlha kafa tlase ga soufara.



"Oo, dumela," Neo a rialo fa a bona mosetsana a eme mo kgorong.

"Dumela, ke nna Gina," mosetsana yoo a rialo. "Ke akanya gore katsana e lo e boneng ke ya me. Leina la gagwe ke Ginger."

Mme fa ba tsena mo phaphosing ya bonno, katsana e ne e sa bonale gope. "Nya tle!" Bella a rialo. "Ke solofela gore katsana ga e a timela gape!"

Gina o ne a lebega a hutsafetse thata.

Mme ba ne ba utlwa Noodle mo kitshining. Wou, wou! Mme ga latela modumo o mogolo wa *KGOTLO!*





Bana ba ne ba sianela kwa kitshining. Katsana ke ele e dutse fale. E ne ya thula sejana sa yone sa metsi fa Noodle a bogola mme jaanong yone e ne e le metsi.

Bella o ne a omisa katsana a e naya Gina.

Purr, purr, purr. Katsana e ne e itumetse thata!

“Wena le Neo lo ka nna lwa tla go etela Ginger nako nngwe le nngwe fa lo batla,” Gina a rialo.

Sefatlhego sa ga Bella se ne sa apoga. “Ke a leboga!” a rialo.

“Mme gone,” Neo a rialo, “ke akanya gore Noodle o tshwanetse go sala mo gae.”

Mme mongwe le mongwe o ne a dumela gore gongwe eo ke kakantsho e ntle.



Fa lo sena go buisa leinane mmogo, buang ka se se diragetseng mo leinaneng. Botsa dipotso tse di fatang maikutlo go rotloetsa bana ba gago go akanya le go bua ka megopolo e e amanang le leinane, ka sekai, “Karolo e o e ratang thata ya leinane ke efe?”

Nna le mathagathaga a leinane!

- 🐾 Opela pina kgotsa tlhama pina e e kaga dikatse le dintša.
- 🐾 Torowa setshwantsho sa karolo e o e ratang thata ya leinane leno.
- 🐾 Dirisa taka kgotsa letsopa go dira sebopego sa ga Ginger kgotsa sa ga Noodle.
- 🐾 **EDira** posetara ya seruiwa sa gago sa mo gae kgotsa sa seruiwa sa mo gae se o ka ratang go nna le sone. Torowa setshwantsho sa seruiwa sa gago sa mo gae. Kwala kgotsa kopa mongwe a go thuse go kwala mmala le leina la seruiwa sa gago sa mo gae.



Bontsha ba bangwe dinepe le dibidio tsa gago le bana ba gago lo itumelela leinane la Letsatsi la Lefatshe la **Puisogodimo** le dilo tse lo di dirileng mo go **#nalibaliwrad2024** mo metsweding ya rona ya dikgang!

TheNalibaliChannel

nalibaliSA

@nalibaliSA

@nalibalisa

@nalibalisa

nalibalisa

The Nal'ibali Trust

+27 64 801 5496

Nal'ibali (ke se-Xhosa le raya "kgang ke eno") ke letsholo le le dirwang mo nageng yotlhe la go balela monate fela. Se re batlang go se fifithlelela ke go bona Aforika Borwa e mo go yone ngwana mongwe le mongwe a itumelelang kgang nngwe letsatsi le letsatsi.



Nal'ibali
GO SIMOLOLA
KA LEINANE.

Setswana